



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 10

Taoba mapang CBI Director,
Ranjit Sinha süogo

Harmanpreet Kaur 'COVID-19'
nungi taneptsü nguogo



VOL. XVIII NO. 182 (ADOK 182) DIMAPUR

KÜPTOKNÜ (SATURDAY)

RONGCHII (APRIL) 17, 2021

₹ 5.00

COVID-19 Nagaland: Nisung 22 dak putet

Kohima, April 16 (TYO): Hokolbarnü Nagaland nung nisung 22 dak COVID-19 aliba putet aser parnok züngsema nisung ajak agi 12,504 kümogo.

"Tanü nisung 22 dak COVID-19 putet. Parnokji Dimapur nung nisung 15, Kohima nung 4, Mokokchung nung 2 aser Longleng nung 1 lir. Külen, Dimapur aser Kohima nung nisung kaka taneptsü nguogo" ta Health & Family Welfare Minister, S Pangnyu Phom-i metetdaksü.

Nisung 12,504 rongnung 12,102 taneptsü nguogo aser tang nisung 139 anepaludar, ta paisa ashi. Nagaland nung COVID-19 nungi taneptsü angur 96.78% kümogo, ta State Nodal Officer for Integrated Disease Surveillance Programme, Dr Nyanthung Kikon-ia ashi.

COVID-19 puteter nisung 94 asüba nungi parnok 10 bo tanga timtem ajanga asü, ta paisa ashi.

Nisung 169 tashi tanga state temi ogo. Tang anepalurtem

rongnung nisung 14 dak shirangba yimya terara lir saka nisung 125 dakbo kecha mali, ta Dr Kikon-isa ashi.

Nagaland nung COVID-10 alitsü akok ta temolung melemi bilemba sample 1,39,828 tendangogo. RT-PCR ajanga sample 76,111, TrueNat ajanga 37,649 aser Rapid Antigen Test ajanga 26,869 tendang.

Brihostibar tashi nung Nagaland nung nisung 1,09,176 nem covishield indang dose 1,41,220 agütsüogo, ta State Immunization Officer Dr Ritu Thurr-i metetdaksü. Vaccine agirtem rongnung frontline workers 42,002, healthcare workers 13,140, teintet rogo 29,017 aser arishi küm 45 ser temapur 25,017 lir, ta paisa ashi.

Frontline workers 20,701, healthcare workers 9,022, teintet togo 1,580 aser arishi küm 45 ser temapur 741 tashi vaccine indang dose anaprong agiogo, ta Dr Thurr-isa metetdaksü.

Nagaland sorkari SOP tasen latettsür; Nisung 50% dang adenshitsu melar

Kohima, April 16 (TYO): Linük nung COVID-19 wara kanga menatepa aoba nung ajemdaker Hokolbarnü Nagaland sorkari Standard Operating Procedure (SOP) yanglushiogo.

Nagaland nung Containment Zones tema nung lokti, shisaliok, sobaliba, yimtenren aser tamangba yimsü dak sendakba sentongtem agitsü melar, saka sentong agidak 50% mesüra nisung 200 tashi dang adentsü melar, ta Chief Secretary J Alam-i tanü sangdong ka nung metetdaksü.

March 19 nü Nagaland state sorkari sentong ajak nung 100% adenshitsu temelaba agüja liasü saka tanü agütsüba tetuyuba ajanga ibaji agienogo.

Kima nung agiba sentong nung nisung 200 tema

adenshitsu kümra, bangdak District Task Force (DTF) dang nungi temelaba meshitsu, ta paisa ashi.

Tamangba yimsü dak sendakba tesemtem nung nisung 50% mesüra 200 tashi dang adenshitsu akok. COVID-19 azüoktsü atema ajaki face masks enoktsüla, tepila ayutsüla aser mapang shia teka metsütsüla, ta Nagaland Chief Secretary-isa metetdaksüogo.

Pei pei District Task Force on COVID-19 nungi jelia temelaba meshiba sülen ang intra-district sports sentongtem ayonga amongtsüla. COVID-19 azüoktsü atema nisung ajaki SOPs beshitsu ta paisa ashi.

Saisapong sentong tulu amongtsüsa kümra Home Department dang nungi temelaba agitsüla, ta Chief

Secretary-isa shisem.

Maneni, theatres, multiplexes, cinema halls nunga 50% dang adenshitsu aser SOPs beshitsu tetuyuba agütsüogo.

High Powered Committee on COVID-19 Co-spokesperson aser Advisor Mmhonlumo Kikon-ia ashiba agi "HPC-i taruba anogo ishika tsüngda school aser transports atema telemetba agitsü."

"COVID-19 wara tanabuba tensa ajuruba ajanga sorkari virus azüoktsü atema ozüng akangshitsu" ta Mmhonlumo Kikon-isa metetdaksü.

"Tensa dak rangloker aser COVID-19 menatepa aoba nung ajemdaker lockdown atema telemetba agi. Nagaland state-i COVID-19 wara tanabuba anema raratsü asoshi renema lir," ta Kikon-isa ashi.

Dimapur nung Geo Park lapok



April 16, 2021 nü Dimapur nung Geo Park lapokba sentong nung Geology & Mining Department Director S. Manen den tetushi jaokertem aser ketdangsurtem külemi agiba angur. (Dimapur, April 16)

Dimapur, April 16 (TYO): April 16, 2021 nü Directorate of Geology and Mining Nagaland, Dimapur nung 'Geo Park' ka lapokogo.

Hokolbarnü Geology & Mining department Director, S. Manen-ia iba park lapokja liasü.

Nagaland nung anguba lung tapu balala angatetdaksütsü atema iba Geo Park lapoktsü shisatet, ta S. Manen-ia ashi.

"Retired Additional Director, DGM-i anir züngsem 7 agi akümbe ludeni senotsü peria meliaka iba park asangsang kuma yanglutsüba atema kanga pelar" ta paisa metetdaksü.

Tarutsü putu atema aser talisa state ajangzüksü asoshi Department-i tesem balala nung ali telung nung aliba rongsen bushitepa arur, ta S. Manen-isa ashi. Paisa ali telung nung aliba tzu timba kümdaksütsü atema kanga tongtipang süa jembi.

"Department-i ali telung nung aliba tzu timba kümdaksütsü atema lenmangtem bushitepa mapa inyaka arur," ta Geology & Mining Director-isa shisem.

Iba sentong nung Dimapur SDO (civil) Hotolu Sema aden aser

pai Geology & Mining Department nem tenüngsang agütsü. "Geo Park ajanga nisungtem dang lung tobur ajungba sayutsü mapa inyakba atema tenüngsang agütsür. Geology & Mining directorate-i iba mapa inyakba ajanga sorkar department temi pei teti inyakba mapa dang nungi tali awaloka oa inyakba sayur. Tanüngba department temia iba ya tatishitsü tajung ka ama angazüka inyaka aotsü imlar" ta Hotolu Sema-isa ashi.

Sentong nung geologist David Lhoupenyi-i okila jembidang Nagaland nung anguba lung tapu balala amshia iba park yangluogo ta ashi.

Wazheho, Phongkhuri, Moke, Mollen, Ziphu, aser Satuza dena Nagaland kübok tesem balala nungi lung tapu 11 bener arua iba Geo Park nung yua lir. Ano lung kar bener arusema ayutsü, ta Lhoupenyi-isa metetdaksü.

Iba sentong nung mendenji Geologist Imlinungla Walling liasü, Baptist Pastors Fellowship Dimapur President, Rev. Vitoshe-i temoatsü meshia sarasadem aser Joint Director, Er. Chirhotho Rasutho-i anküp tepela o jembi.

RIIN atema Joint Consultative Committee tentetogo

Kohima, April 16 (TYO): Nagaland sorkari kin hohotem aser civil society tem den senden amendang Register of Indigenous Inhabitants of Nagaland (RIIN) mapa kuma inyaksü atema Joint Consultative Committee (JCC) ka tentetogo.

Hokolbarnü State Banquet Hall nung ghonda asem dak tali senden amen aser idangji JCC ka tentettsü aser parnoki Banuo Z Jamir commissioner report

jungjunga shisadangba sülen RIIN mapa kuma tenzüksü telemetba agia liasü.

Senden nung RIIN atema kanga junga olemtepogo aser JCC tentettsü lemet, ta Nagaland sorkar otongdar aser Advisor Mmhonlumo Kikon-ia ashi.

Iba luden nung mendenbubaji Home Commissioner aser tezülurji Commissioner Nagaland asütsü. Luden nungsa Central Nagaland Tribes Council

(CNTC), Eastern Nagaland People's Organization (ENPO) aser Tenyimi Peoples' Organisation (TPO) nungi teshimtet nübotem züngsem asütsü.

Ludenisa Nagaland Garo Tribal Council, Kuki Inpi Nagaland aser tanga non-Naga teloktem nungia züngsem tasentem anioktsü akok, ta Mmhonlumo Kikon-ia metetdaksü. (Maneni tapak 10 nung...)

Mkg nung Apr 17-May 2 tashi school ajak shibangtsür

Mokokchung, April 16 (TYO): Mokokchung Municipal Council (MMC) telungtet nung aliba school-tem den temeket yim - Ungma, Chuchuyimpang, Khensa aser Mokokchung yimsü nung aliba Govt/Private school ajak offline class April 17 nungi May 2, 2021 tashi khen anena atatsü Mokokchung deputy commissioner, Limawabang Jamir-i ozüng kuma metetdaksüogo.

Iba ya tawa tanü Mokokchung town kübok school kar nung Covid-19 positive case putetba ajanga nüburtem kümzüka ayutsü nükjidong nung District Task Force Covid-19 senden April 16, 2021 nü amendang telemetba agi.

Covid-19 wara perokshia moudaktsütsü aser tsüngsü bushiba nungdak maparen kar inyaksü atema offline class-ji khen anena atar, saka online class jibo maneni agia aotsü asoshi Mokokchung DC-i agütsüba ozüng nungji shia lir. Class shibangba mapangji private tuitions/home tuitions/coaching centres-tema ajak offline class khen anena atatsü tetuyuba agütsür, ta kasa ozüng

nungji shia lir.

Iba mapang nungji tsüraburtemi pei chirnurtem nüngdak makaba nung kima yimdongi mashimashi meyoktsüla, ta Mokokchung DC-isa tekümdangtsü ka metetdaksü.

Tang HSLC/HSSLC tatidang koba agidar, ibajibo maneni exam centre ajak nung Covid-19 arla aser inyakyim (SOPs) nung shia aliba ama shitak beshia aotsü, ta Mokokchung DC-isa metetdaksü. Item tetuyuba kübok manitakertem temzüngi melaba ama temerenshi alitsü, ta paisa metetdaksü.

Mkg nung AWUMT nem mask mittsü tashi agütsür

Mokokchung, April 16 (TYO): Covid-19 positive case tali züina aoba ajanga tekümdangtsü mera kar agitsü atema iba telemetba ya agiba lir, ta osang ajanga metetdaksü.

Mokokchung Municipal Chamber (MMC) aser Mokokchung Council of Commerce & Industry (MCCI)-i dokan-tem nung teka metsükdak/hand sanitizer aka maka aji reprangtsü aser ano shishilembai arurtem ajak kangtepa mask agidaktsütsüla. Covid-19 arla anema shishilembaba mapa kecha meinyaktsüla, ta Mokokchung DC-i ozüng agütsüba nungji shia lir.

April 13 aser April 16, 2021 nü District Task Force Covid-19 senden amenba mapang Mokokchung nung Covid-19

Mokokchung deputy commissioner-i melaba Police aser Magistrate-temi mapang shia Covid-19 temzüng dak sentakba nung ajungbena mittsü, ta tekümdangtsü o ka metetdaksü.

Maneni senso ajaki Covid-19 arla kobasa lateta lir, ibaji kanga junga anitaka beshitsu aser nüngdak makaba nung nübur watidak mashimashi mesenzütsüla, ta Mokokchung DC-isa metetdaksü. Item tetyuba nung tashi mangartem temzüngi melaba ama temerenshi alitsü, ta Mokokchung DC-isa metetdaksü.

Yajang-i Molungkimong nem Dr. E. W. Clark yipzükba kimong agütsü



Tsürang tzüpak nung Dr. E.W. Clark yipzükdak Yajang aser Molungkimong yimsüsür, Arogo tenzüker aser yimtsü-yimbo tem külemi tangokba noksa ka yangi angur.

Dimapur, Rongchii/April 16 (TYO): Tsüngrem tenüng nung azüngashia April 15, 2021 nü Yajangi Molungkimong nem Tsürang tzüpak nung Dr. E. W. Clark yipzükba tesem Mission mapa asoshi amshitsü nüngo agütsü.

Dr. E. W. Clark, Naga tenem nung mezüng Molungkimong-i Tsüngrem osang tajung bener atudang, December 17, 1872 aonung Tsürang tzüpak nung tesem ka nung yipzükba liasü. Iba aonung tsükchir aser shiruru tesashi nungi kümzüksü asoshi Molungkimong nung arshir 60-i Dr. Clark anük. Naga lima nung mezüng Khristan yimsü pokokba den sendaka iba tesem ya temeshi kimong ta angateta, wazüka yua aru. Iba temeshi kimong ya Sibsagar, Assam

nungi Molungkimong tashi aliba 'Gospel Path' nung lir.

Iba temeshi kimong agütsüba sendong Tsürang tzüpak nung agidang, Yajang Mademsanger Putu tatar I. Akok-i, "2019 küm June 7 nü Molungkimong aser Yajang tesendaktep yanglushiba metsüji tanü nungi tenzüker. Oboula Dr. Clark yipzükdak tesem nung Molungkimong yimten aser Arogo-i kimong ka aginer ta Yajang yimten dang asüngdang nung, tanü Yajang yimteni oboula Dr. Clark yipzükdak lumong ka agatsür. Anungji iba ya ajanga Yajang aser Molungkimong tanjungtiba jungshitepa aser yariteba aotsü merangdi," ta ashi.

"Molungkimong aser Yajang akangjungshiji mesenshitsü ta yimten O shitsür," ta anosa

Yajang Mademsanger Putu nungi tatar Imna-ia sentong nung ashi.

Molungkimong Village Council Chairman, Y. Imsü Tzüdir-i kasa sendong nung jembiba mapang, "Yajang yimten-i Dr. Clark yipzükdak tesemji molungsoa agatsüba pelashishia agazüker. Tanü anogo ya asenoki kodanga mamashitsü," ta ashi.

Iba sentong nung Rev. Yapang-i yim ana asoshi Tsüngrem temoatsü meshizüka sarasadema, Yajang-i Molungkimong nem agütsüba lumong arr nung süngdong adem.

Iba sendong nung Molungkimong aser Yajang nungi arogopurtem, yimden yimsüsürtem aser tantsü-tampu dena liasü.

DoSE ajanga metetdaksür

Dimapur, Rongchii/April 16 (TYO): Online Course Batch 2017-19 indang training agir shirnoki pei Study Centre Coordinators ajanga TMA Awards nung timtem ajuruba indang osang agüjaka tang tashi iba timtem mabentetteti ali, parnok dang tsünglanglen agüja aliba tejangja agütsüsü metetdaksür, ta Department of School Education ajanga sangdong ka nung ashi.

Training agirtemi email (sno.nios.nagaland@gmail.com) ajanga State Nodal Officer nem April 22, 2021 tashinung

training agir tenüng, enrolment number, study centre code, TMA Errors aliba subject code, Study Centre Coordinator-i email ajanga timtem aliba osang sangoktsüba mezüng anogo, training agir indang mobile number tem agütsüsüla aser iba ken o ya NIOS kettangsüri NIOS Headquarter semdangba mapang benoka jembitsü, ta sangdong ajangasa ashi.

Item tejangja ya 'attachment' nung masü saka 'text format' nung agütsüsüla, ta sangdong ajangasa ashi.

Tanü BJP Nagaland unit state executive senden amentsü



Dimapur, Rongchii/April 16 (TYO): BJP Nagaland unit pur state executive senden ka April 17, 2021 nü IMC Hall, Dimapur nung anepdang 10:00 ako nungi tenzüka amentsü. Iba senden nung state executive züngsem, district tirtem aser Mandal tirtem den alakteta jaokertem arua adentsü.

Dimapur nung April 16, 2021 nü osangbener senden ka nung jembiba mapang, BJP Nagaland unit general secretary (Admin) Khevishe Sema-i ashiba agi, iba senden tenzüka BJP Nagaland state president Temjen Imna

Along-i jembitsü. Iba party senden nungya Nagaland Deputy Chief Minister Y Patton, Ministers Jacob Zhimomi, Minister Kashiho Sangtam, Minister P Paiwang Konyak, Minister S Pangnyu Phom aser Advisor Khehovi Yeputhomi nungeria o jembitsü.

Ato Kilonser Narendra Modi lenisüba kübok BJP sorkari sentong balala yanglua takok ngua inyakba ajanga state nung densema nüburtem ajangzükba indang Khevishe-isa lemsatapa liasü.

DoHE ajanga orientation sentong ka ayongzükba agi



Kohima nung April 16, 2021 nü "Choice Based Credit System" sentong nung anogo ka orientation program agidang Prof. Pardeshi Lal aser dangartem külemi tangokba noksa ka yangi angur.

Kohima, Rongchii/April 16 (TYO): Directorate of Higher Education, Nagaland ajanga secular college indang principal ajunga asoshi "Choice Based Credit System" nung orientation sentong ka Directorate of Higher Education, Kohima nung April 16, 2021 nü ayongzükba agia liasü.

Iba sentong ya De Oriental Grand, Kohima nung agitsü liasü, saka COVID-19 wave tanabuba tenzükbata tensa mechi virtual meet dangi melena agi.

Iba sentong ya Prof. Pardeshi Lal, Vice Chancellor,

Nagaland University (NU), Lumami ajanga lapoktsü.

"Choice Based Credit System" amshitsü kanga tongtipang ta rasaa ashiba mapang, Department of Higher Education aser academic tsütsü lenirtemi shisaliok tajungtiba agütsüsü tejangraba aliba asoshi pai pelaba lemsatapa liasü.

Pai ashiba agi, linük yangerba lenir tajungtem tera ya kaket rejutem nung yangloker tenzükbata lir.

Iba sentong tetenzü nung Anoop Khinchi, Secretary,

Higher and Technical Education, Nagaland menden liasü aser Dr. Apeni Lotha, Director, Higher Education, Nagaland ajanga tepela ankep o jembia liasü.

Kasa sentong shilem mezüngbuba nung Prof. Dipak Sinha, Director, IQAC, NU Lumami ajanga "Syllabus under Choice Based Credit System: Implementation and Guidelines" onük nung ajemdaker jembia, kong Dr. Lily Sema, Principal, Kohima Science College (Autonomous) Jotsoma menden liasü.

Sentong shilem tanabuba nung Dr. R.K. Behera, Dean, Academic, St. Joseph University, Dimapur ajanga "Practical aspect of implementation of CBCS" onük nung jembia liasü. Iba session nung Nagaland College Principals Forum tir aser Principal, Japfu Christian College, Dr. Asakho Hibo menden liasü.

Maneni iba sentong nung Dr. Katoni Jakhalu, Additional Director, Higher Education, Nagaland, Kohima ajanga sentong shibangba o jembia liasü.

University Grants Commission (UGC) ajanga

CBCS ya ajaba Choice Based Credit System ya tenzüka Higher Education Institutions (HEIs) ajak nung amshitsü renem.

Nagaland nung CBCS ya tang Autonomous institution asem nung amshir aser Nagaland University nunga taruba academic session nungi benoka amshitsü.

Linük tesem ajunga nung Higher education system tajungba kumdaksütsü mechi UGC ajanga ozüng aser totuyuba balala yanglua lir.

CBCS ya kaketshir dak rangloker tajungtiba nung sayutsü aser angazüktsü nükjidong nung yanglu.



NDPP Women Organization Mokochung Region ajanga region nung aliba assembly constituency ajunga indang Women Organization tem den shisadokten senden ka mena party tashi itshitsü indang jembia liasü. Iba senden ya NDPP Region Office, Sangtemla ward, Mokochung nung April 16, 2021 nü mena liasü.



Bohag Bihu benjung amongba tiyalong nung Guwahati kübok Fancy Bazaar tesem nung Hokolbar nikongdang kitsük kirong lendong tulu ka atalokogo. HB Road, Fancy Bazaar anasa restaurant ka nung LPG cylinder apokba ajanga lendongji atalok ta osang angazüker, ajisüaka iba lendong nung nisung yiruba mesüra asüba osang kecha mali. (Guwahati, April 14)

Manipur High Court-i BJP MLA anentsür

Imphal, April 16 (Agencies): Manipur High Court-i MLA Okram Henry shimba indang election agienogo.

2017 küm pa Manipur assembly election nung Wangkhei assembly constituency nungi takok ngua liasü.

Yumkham Erabot Singh-i benokba ken o ka angadangdang Justice MV Muralidaran-i iba tetuyuba agütsü.

Assembly election nung Erabot Singh-i BJP ticket amer Congress candidate Henry den toktep saka Henry-i BJP nung aden.

11 buba Manipur Legislative Assembly

elections 2017 atema affidavit agütsüdang Henry-i Election Commission of India tsüngdang pa indang educational qualification tai agütsü aser ozüing alema ken o ka miimshi, ta Singh-i tai tongloktsü.

Okadaki tetuyuba agütsüba nung Election Commission tsüngdang "false affidavit" indang onük tetshia lir.

2017 assembly election nung Henry-i votes 16,753 aser Singh-i votes 12,417 angu.

Henry-i highest educational qualification ji Punjab University nungi BA ta agütsü aser 2017 election nung pai highest educational qualification Manipur Public School, CBSE nungi Class XII

ta agütsü, ta Singh-i ashi. Henry-i Election Commission dang pa anema ken o ana benoka aliba mashi, ta paisa tai tongloktsü.

Henry-i 2017 election nung Congress ticket amer toktep. Pa ya taoba Manipur chief minister Okram Ibobi Singh'er kinunger lir.

Yaküm August ita pai Congress MLA pungu den külemi Congress toktsür BJP nung aden.

Yaküm September ita chief minister N Biren Singh-i cabinet minister 6 anentsü aser Henry dena MLA tasen pungu anioka liasü.

Henry-i social welfare, cooperation & MAHUD mapatem ketdangsüa liasü.

Tripura nung NLFT züngsem 2 temai adok

Agartala, April 16 (Agencies): Tripura nung National Liberation Front of Tripura (NLFT) züngsem ana police tsüngdang temai adokogo.

NLFT züngsem anaji North Tripura SP and DIG (North Range) Lalhminga Darlong tsüngdang temai adok.

NLFT züngsem anaji Bangladesh nung training agi aser Nagaland nung NSCN züngsemtem den külemi liyonga aru. Tenati revolvers asem den injangtem bener arua agütsüogo.

NLFT züngsem anaji-Uttam Kishore Jamatia aser Joseph Jamatia na lir.

"NLF-i inyakba mapa aika

nung Uttam Kishore Jamatia-i shilem agiogo. South Tripura district kübok Chechingcharra nung CRPF jawan 17 tepsetba aser CRPF bus gari ana amakba nung pai shilem agiogo" ta police-i metetdaksü.

Joseph Jamatia ya NLFT D Umthai faction nung sergeant ka liasü.

NLFT aser NSCN-IM tsüngda pa ya tesentaktep tongtiba liasü. Pa ya Nagaland kübok Dimapur nung NLFT atema 'town commander' liasü.

April 2017 nung Jampuijala police station kübok Rs 18 lakh jungnüa MGNREGA funds auyaba nung Joseph Jamatia-i shilem agiogo, ta police-isa ashi.



Hokolbarnü Agartala nung Ramadan temeshi ita nung kanga sapua achiba Vermicelli yangluba noksa nung angur. (Agartala, April 16)

AR-i Arunachal nung yimdaklirtem asoshi medical camp ayongzük

Itanagar, April 16 (Agencies): Assam Rifles indang Longding Battalion-i Wanu yimdak Medical Camp ka ayonga agiogo.

Iba mapang yimdaklir 340 nem teyari balala agütsüogo. Nisungtem rongnung tebur 90, tetsür 180 aser tanur 70 liasü.

Iba medical camp nung yimdaklirtem dang COVID 19

wara mapang temang merüka ayutsüba, face mask enoktsüba aser tanga inyakyimtem metetdaksü.

Brihostibarnüa 23 Sector Assam Rifles (East) indang Lunglei Battalion-i Lunglei, Mizoram nung Baptist Church Orphanage Home nung alirtem nem anti-Covid-19 osettem agütsü.

CoMSO-i Meghalaya Secretariat kima lungkak ait



Shillong, April 16 (Agencies): Hokolbarnü Confederation of Meghalaya Social Organizations (CoMSO)-i Shillong nung Meghalaya secretariat building kima nung adenshir lungkak ait.

Meghalaya nung Inner Line permit (ILP) benoktsü atema bangzüngtepba agizükang mesüra agienang ta parnoki Centre sorkar nem takhangba agüja lungkak ait.

CoMSO züngsemtemi secretariat kishi tashi ao aser state sorkar dang Meghalaya nung ILP benoktsü atema Centre dang nungi telangzüba meshiang ta takhangba agütsü.

Meghalaya assembly-i December 2019 nung ILP mapa tenzüksü atema bangzüngtepa lir. Meghalaya nung sensotem

kümzüka ayutsü atema Bengal Eastern Frontier Regulations, 1873 kübok ILP benoktsü atema sorkari bangzüngtep.

"Tanü onoki Secretariat tashi ajungbena jajayonga aobaji state sorkar saksalemdaktsütsü atema lir. Parnoki Centre sorkar dang ILP atema telangzüba ka meshitsüla" ta CoMSO züngsem, Roikupar Synrem-i ashi.

"State sorkari Centre den kecha mejembitetra, CoMSO-i state secretariat shibangtsütsü kechiyong iba tebilemstü onük atema meinyaktetba sorkarji nüngdak mali" ta Synrem-isa ashi.

Tanü CoMSO züngsemtemi secretariat kishi jakdang adenshir yimyim ayim aser sorkari ILP mapa meinyakba atema tai tongloktsü.

Manipur highway nung truck garitem dak injang khaloktsü

Imphal, April 16 (Agencies): Manipur kübok Imphal-Jiribam national highway nung mejangjatetba nisung kari truck garitem dak injang khaloktsü.

Iba tesem nung tensa aziüoktsü atema sepaitem mapa lemzüksüogo.

"Tanep Imphal Jiribam National Highway nung

mejangjatetba nisung kari truck garitem dak injang khaloktsü. Parnoki truck tire aser totzü pongdang nung injang khaloktsü" ta osang ka ajanga ashi.

Iba ya Kaiphundai yim anasa atalok aser iba ajanga Northeast nung aser talisa Manipur nung telungpurtemi mapa inyakba tebilemstü ka

adokogo. Iba Highway nung telungpur telok balalai mapang shia garitem dang nungi tashiyim agi sen sarur.

Manipur nung Kuki telungpur telok 18 lir. Kuki Revolutionary Army (KRA) aser Kuki National Army (KNA) dak alia tanga teloktemibo mapa kanga meinyaker.



Hokolbarnü OJU Welfare Association (OWA), Campus, B-Sector, Naharlagun nung sentong ka agidang National Commission for Protection of Child Rights (NCPDR), New Delhi Member Mrs. Taba Rosy-i tanurtem nem games & sports osettem agütsüba noksa nung angur. (Naharlagun, April 14)



TIR YIMYIM YIMOBILEM (EDITORIAL)

DIMAPUR KÜPTOKNÜ, RONGCHII (APRIL) 17, 2021

Mapa tema ayutsula

Tang ama anogo shia Covid-19 tashidak mesen nisung teimba teimba dak aliba puteta arudang, asenok kümdanga aliba den külemi tanü mapa tanü tema ayutsula aser tamasa amato senzusenpongtsü mesademi ka aküm nunga timtem majurutsüsa tang yongi renema ayutsula. Asenok aikati tanü tema ayutsüba mapa ser nung asüng inyaksü anünga ayur aser asüng anogoji komaka asütsüar asenok shingaia memetet. Covid-19 tashidak wara ya komaser poktet aser komaka nung atemtsüar shingaia meshitet, anungji pei kümdang kümdanga alitsübaji kanga tongtibang lir. Tenük agi mangur asünungji, aikati Covid-19 tashidak wara agi shirangba aser nisung asüba ya tiyazü amato bilemer, saka tiyazü tashidak aser olulu agi tashitemetet limatem dena yamai timtem takoksa arema tashidak wara nokdangba mapa meinyaksü ta asenoki angatetdi. Joko, Delhi nungbo nisung tali asüba agi Hindu nunger leper nung mang arondak ronger merongma asür kinungertem atateper. Aji oda, asenok khen mekümdanger ta asüdag, iba kasa tia jagi memeteti dang asen lima atongtsü. Tang tashi nungbo asenok aikati Covid-19 tashidak wara ya kangabo metsübur amai repringtetter. Ibaji, ashiko, asen dak matalokba agi asütsü. Ajsüaka, asen kinunger aser medemer ka sür külenang kümdangtsübaji kanga menuadoker asütsü. Aji oda, Covid-19 tashidak wara nungi jenbua alitsü asoshi benshitsü tetuyubatem agütsüba ya asenoki tangar atema inyaksür amato mebilemi asen taküm aser asen kinungertem kümzüksü asoshi lemang sayur ta angateta anidaksüla. Atangji, India ama lima ya Tsüngrem dak amangba lima ka asünungji, Hindu, Muslim aser Khristan yimsü dak amanger tamanger ajaki Tsüngremi kümzüksü ta amanger. Iba jagi nisung aikati Tsüngrem nem dang nungloka toktsür, pei linütsü alir aser inyaksü inyaker. Aji oda, tang ama Covid-19 tashidak wara tanaben ayimsünga ao tialong nung, Hindu nunger tekülem benjong amongtsü asoshi nisung lakh junga tula masem ayongküm nung nungtepba asenok aikati nguogo. Iba ama nung jagi tashidak wara ya menokdangtetsüsa prokshitsü. Iba amaji asenok Khristan-temia asenok kümdanga maliyonga Tsüngremi kümzüksü ta bilemer. Ajsüaka, shin o nung ashi ama, tia-ia tasü aiterterem dang yaritetter aser peisasa pei taküm meima anepalurtem dang Tsüngremia yarir. Aji oda, takoka temerangertemiang ngutetter. Akhidang memetetba putu nungbo mapa ajak Tsüngrem sayatenya nung lia aru saka tanübo Tsüngremi Pa melen inyaksü asoshi alima nung tashitemetetertem yuja lir, anungji tashitemetetertemi asenok meshirangtsü aser lendongi maitsü asoshi tetuyuba agütsüba nung asenoki tashi anga anidaksüla. Aji oda, akhidangbo mozü machiyonga odang shirang ajung, kechiyong mozü achitsü memeteti liasü saka tanübo mozü achi nung dang Tsüngremia yaritettsüba putu nung asenok alir. Item wainshinji meteta asenoka Tsüngrem dak amanger ka ama Tsüngremi asenok yaritettsüsa asenoki asenoksasa yari ashitsü tim. Atangji, alima agi ojangji, tang amai tashidak tasen poktetpet poktettsü, anungji tashidak wara tamajung aliba agi ki shibanga yur kechalenia mao aser kecha meinyak among nung majungtsü, anungji tashidak liang teli, taküm lia aotsü atema mapabosa inyaksüla. Iba tangatetba nung tashidak mopong koka mapa inyaktetsü atema temang tashi itta ayutsübaji kanga tongtibang asütsü aser achiajem mazüoktetba yimya tamajung melenshitsü mapang tajungtibaji Covid-19 wara agi amokmerenba mapang ya lir. Alima nung ya timtem agi anar temoatsü arur, anungji tang ama timtem aser shisabolu mapang nung asenoki alima nung ya lia aotsü atema jungjunga sarasadema bilemdangra, Tsüngremi asenok nem mapa inyaksü tasa tasen agütsütsü. Asenok shilemji kümdanga alitsüla aser azümesen melii tanü mapa tanüsa temadoktsüla. Tanüngbajibo Tsüngremi inyaksü.

OLEMSABANG

Tsüngremi sakloktsüsa litetba nisung Tsüngremi ajungketer

- L. Kika Pongener.

Asenoki laishiba nung Tsüngremi sakloktsüsa taküm litetba nisung kar bushidangra, Uz lima nung tetemjen nisung ka Yob liasü. Tsüngremi pa nem jabaso tenet aser jala asem moatsü. Pa rongsen San meyi tenet, Ut meyi asem, alu alaba Nashi-Pungchi jura noklang pungu, Gado Tsüla noklang pungu, aser kilir aika liasü. Iba jagi anutoklen lima nung alir ajak dang pa tulutiba aser takatiba nisung liasü. Yongji Tsüngremi Mojing nem Yob taküm aser par kibong tendangtsü atema bendanga agütsü, kechiyong Mojingi kechi komaka tendang-aka Yob-i kodanga Tsüngrem nungi pila-a maotsü ta Tsüngremi jungjunga meteta liasü. Mojing-i Yob-er jabaso/jala ajunga taküm samatsü, par takaba rongsen ajunga samatsü, aser tatem nung pa dak temang sunga 'Tepzü-nu komo' adokdaksü, ajioda, O agi ashitsü mali, Mojing-i Yob taküm tesungmangtsü-ka reshikangshia timtemdaksü. Ajsuaka, iba ama timtem tia nung liaka, Yob-i Tsüngrem anema mejembi, Tsüngrem anema tai memena aser Tsüngrem nungi pila-a mao. Yongji Tsüngremi Yob taküm aser par kibong ano tanaben mezüng tia dang nungi kanga agi tajungtiba moatsü. Yob takaba rongsen San meyi ter-pezü, Ut meyi trok, alu alaba Nashi-Pungchi jura meyi-ka, aser Gado Tsüla meyi-ka ta Tsüngremi moatsü. Mezüng ama jabaso tenet aser jala asem moatsü. Atangji Yob rongsen mezüng jenjang dang nungi anasü agi tali moatsü. Shirnoki Tsüngremi sakloktsüsa taküm liteter, Tsüngremi parnok yamaji moatsütsü.

Ano Yosef taküm otsü repringdangra, tedi nungeri tenukmerem mokokachi agi, tebu dang tiyazü otsü atongtepa yanglur, Yosef arem shirurui tepsetogo ta ashi, saka Yosef tedi nungeri Ishmail nunger dang alar asütsü ayok. Ajsuaka, Yosef-i Tsüngrem anema aibelen kecha meinyak, indang-indanga Tsüngremi sakloktsüsa taküm litetba agi, Farao chuba'er tongtipur Potibar kidang alar jenjang nungi, Ijip lima ajunga nung Farao Chuba den atongba 'Prime Minister' menden tashi Tsüngremi ajungket. Tiyazü agi takok angubaji kodanga arishia nokdak-a malitsü, kenubo maaksua laoa-adoktsü. Yosef tedi nungeri tiyazü otsü atongtepa yanglur tebu ashioksü, aser Yosef anema tashiyim mapa tamajung tulu inyak, saka Yosef asoshi-bo ibaji chuba mendeni atutsüba tia melenshitsüba mapa ka-ang liasü. Aji oda, nisungi kechi kodakirna mesen-metoo/ mezüngmeshia jentok-aka, shirnoki Tsüngremi sakloktsüsa ajemalua tila küma taküm liteter, par kibongji Tsüngremi balaka moatsütsü/ajungkettsü. Itum chimur aser semchi-semnurji Tsüngremi balaka jenjang tajung nung yutsütsütsü/ajungkettsü. Tsüngrem o-i ashir, shirnoki Tsüngrem dak temulung lema ochishia indang-indanga alir parnok jagi ashitsü... "Kibuba kü tsütsü lir; Nisungi kü dang kechi inyaktetsü ? Kibuba kü tsütsü ni yaritsü lir. Aji asünung shirnoki ni sempar parnok madak takokba nung ni repringtsü. Nisung dak tamang aka dang nungibo Kibuba dak temulung alem tajungba. Tongtipur dak tamang aka dang nungibo; Kibuba dak temulung alem tajungba" (T.Ken.118:6-9). Atangji tular, takar, tashitemeteter, nutsüng-nubu aika, kin-kidong aikati nungita (support) asüyongjia, Tsüngremi meyarira/mesaklokra maaksua laoa-adoktsü. "Shir ajemalurtem lir parnok temoatsüba, kechiaser parnoki alima senmang amangtsü" (Mathi-5:5)

Israel lima nung mezüngbuba chuba asütsü Tsüngremi Saul shimtet, saka Saul chubai Tsüngrem mepelatsüsa inyak, Tsüngremi mesakloktsüsa litet, anungji Tsüngremi Saul chuba sentok. "Ni Saul chuba kümdaksüba atema ni temulung meyiper" (1Sam-15:11). Samuel ainkar-i Saul chuba atema Tsüngrem dang kanga mang ayim... Saka Tsüngremi Samuel ainkar dang ashi, "Ni pa Israel madak chuba asütsü magizük nung, nai Saul asoshi kopiga mang ayimtsü ?" (1Sam-16:1). Alima chuba menden nung amener nungi shir, tilatiba yimtsüng nung yimsusurtem tashi, Tsüngremi mesentoktsüsa yimsu asütsü kanga tongtipang lir. Nisungi yangluba ochi nung nendaker masü, nisung tsüngdang shitak/ochi mesukba nung masü, saka Tsüngrem tsüngdang ochiba/shitakba nung ajemndaker yimsu asütsü kanga tongtipang lir. "Nisung tsüngdang shitak mesukba lenmang ka lir, saka iba tatempanji tasüba lenmang (A. Shin-16:25). Atangji, nisungi yangluba ochi jagibo tatempanji nung tasüba lenmangi anitsü. Anungji yimsusurtemi anir, arogo aser loktiliba ajunga nung lennirtemi nisung nem saklokdaoktsütsüsa masü, saka Tsüngrem nem saklokdaoktsütsüsa yimsu asütsü, arogo aser loktiliba anitsü merangdi.

Atangji, shirnoki tanak dang tanak ta... temesung dang temesung ta ashir, parnokjibo nisung aikati sempatsü aser arishitsü. Ajsuaka, nisung nungi konang-nungsang angutsü asoshi masü, nisung nungi teyari (support) angutsü asoshi masü, saka Tsüngremi sakloktsüsa yimsu asütsüla, arogo aser loktiliba anitsüla. Alima nutsüng-nubu, kin-kidong, takar, tular ajungai saklok yongjia, Tsüngremi mesaklokra laoa-adoktsü. Saul chubai Tsüngrem jashidaktsü nung, pa melena tangar chuba ka shimtsüba Tsüngremi Samuel ainkar yok, aser Jesse'er jabaso ti rongnung aso-ajen topur tajung, Saul chuba küpok temeranger sepoy-tem ka khen... ka khen ta melentepa sayu, saka itum rongnung Tsüngremi sakloktsüsa kata mali asü. Saka tatemsa kodang arem nung san nuka alisang Dawid, ashiko nisunger tsütsü nungibo aso-ajen topur kangabo tajung masü, temeranger sepoy ka masü, pa-jiang Tsüngremi saklokbaji liasü. Atangji, nisung-i mezüngmeshia/ashishia tezülen/kinuklen agiena ayutsü merang yongjia, shirnoki Tsüngremi sakloktsüsa liteter, parnokji Tsüngremi lenjang-leni anir arutsü. Par chimur/semchi-semnurji Tsüngremi jenjang tajung kümdaktsütsü/ajungkettsü. Alima miimchir-ibo chuba yimli yimsusuba mendeni nisunger shisatsü, takaba rongsen aser nutsüng-nubu, kin-kidong aika tenungiter aliba, aküm-sentsüket agi yanglur/ajangzüker ama bilemer, saka itum ajakji Tsüngrem kapu nung yua lir. "Mimchir yimli madak Tematibai yimsu asür, aser aji pai mulunger nem agütsür" (Daniel-4:25). "Saka ajemalurtemi alima senmangji amangtsü, aser yimjung nung azükarotsü"(T.Ken-37:11). Arung asenoki Tsüngremi sakloktsüsa ajemalua tila kümdi, aser ochishia Tsüngremi sakloktsüsa yimten, arogo aser loktiliba nung shilem agidi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nashville-Area Arogo ka nung revival adoka nisung 1,000 Bapti



Hendersonville, Tenn. nung aliba Long Hollow Baptist Arogo nung Baptiba sentong agidang tangokba noksa nung angur.

April 16, 2021: Yaküm December ita nung Nashville-area nung aliba Arogo ka nung revival milak jangruba sülen ita pezü jungogo aser iba mapang nungji nisung 1,000 dak tema tzü nung Baptia Amongnü anepdang ((April 11) tekülem sentong ka agia tembangogo.

Hendersonville, Tenn. nung aliba Long Hollow Baptist Arogo nung December 20, 2020 nü Baptiba sentong agiba mapang nung Tsüngremi mapa inyaka liasü. Iba sentong nungji nisung 12 shi dang Baptistsü sentong liasü saka nisung 99 tashi Bapti, ta Southern Baptist Convention osang ajanga metetdaksü.

December ita nung Pastor Robby Gallaty-i, tang Tsüngremi mapa inyakba ama kü taküm nung ni kodanga majangshidang, ta metetdaksü.

Yaküm December ita nung revival mi jangruba sülen nung

tenzüka April 11, 2021 tashi nung Arogo nung nisung 1,000 dak tema Baptiogo.

"Onok tashi agi kecha mazüokteti liasü aser Tsüngremi mapa tulu inyak," ta Arogo nung executive pastor, Collin Wood-i metetdaksü.

Amongnü shia tekülem sentong tembangba sülen baptiba sentong minute 45 shi agia aruogo, aser iba revival atema Tsüngrem nem tenüngsang agütsür, ta Gallaty-i ashi.

Pastor, Gallaty'er tembar tajung ana- Jarrid Wilson aser Darren Patrick na soseta asüba sülen kobi melii par Arogo nung asentenshi milak jangru.

Osangbener den jembidang pastor-i, "Tena soseta masü tsüngda ita trok lia tenapronglai Long Hollow Arogo nung sayutsüngia liasü. Tenaprong kü den chiyungba langbang nung amen. Kibubai kü taküm meyipa repringshitsü atema ni

ajungshia liasü. Ni kanga belemer liasü; nisungtem peladaksütsü atema inyakba agi ni kanga belemadoker liasü. Ni ozü Arogo aser linük nung tebilemstü onüktem atema sarasadem aser tebilemstü onükji ni, ta Tsüngremi kü dang sayu," ta ashi.

Iba sülena pastor-i maneni Tsüngrem dang sarasademba den Pa ola angaa aru, iba sülen December 20 nü Arogo nung baptiba sentong agiba mapang nung Tsüngremi mapa tulu inyak.

Easter Sunday nunga Arogo nung nisung 200 tashi baptia liasü.

2018 küm Arogo nung nisung 162 aser 2019 küm nisung 222 dang baptia liasü saka tesüiba ita pezü tsüngda Arogo nung nisung 1,000 dak tema baptiba ya Tsüngremi mapa inyakba ajanga lir; tanga Arogotem nunga kasa ataloktsü akok, ta paisa metetdaksü.

Lokti tentet aikati USCIRF dang India ya CPC nung züngoktsü mepishir

United States, April 16 (Agencies): Meimchir temeden atema inyakterem aser lokti tentet aikati shidi ajanga United States Commission on International Religious Freedom (USCIRF) dang India ya Country for Particular Concern (CPC) nung züngoktsüla ta mepishio, ta International Christian Concern (ICC) osang ajanga metetdaksü.

2020 küm report nunga USCIRF-i US state department dang India ya CPC nung züngoktsü atema benoka liasü saka magizük.

Meimchir temeden atema inyakterem aser lokti tentetemi, India nung nütsüng ajema aliba tamangba yimsütem anema inyaker, aser yaküm dang nungibo taküm tamajungba, ta shidi ajanga metetdaksü.

2014 küm Ato kilonser, Narendra Modi leniba nung sorkar akümba sülen India nung Khristantem anema inyakba aser reshikangshiba kanga

bulua kümogo.

2014 küm India nung Khristantem anema inyakba tatalokba ken o 147 liasü saka 2019 küm nungbo Khristantem anema inyakba tatalokba 328 tashi liasü.

India nung Hindutva tangatetbatem benokba ajanga Khristantem aser Muslim nung anema inyaksü atema Hindu yimsü alia amangertem temelung uludaksür.

Mapang shia India nung Hindu yimsü alia amangertemi Khristantem amaker, tekülem sentong tagidak mapang nung timtem agütsür, anti-conversion ozüng nung ajemdaker tai tongloksür, sorkar teyari balala magütsür aser Khristan yimsü amangertembo yimtsüng nungi mindoker.

Loktiliba nung Khristantem sendoker, Khristantem kiojen raksatsür aser azüker.

USCIRF ya United States Congress-i amenokba bipartisan commission ka lir aser parnoki

alima tesem balala nung Khristantem anema inyakba asadanga linük balala nung religious freedom indang report agütsür.

USCIRF-i küm shia reports renema State Department dang religious freedom anema inyakba linüktem CPC nung züngoktsü atema benoker.

Yaküm-a Commission-i International Religious Freedom Act anema inyakba atema India ya CPC nung züngoktsü atema benoka liasü saka state department-i magizük.

ICC Director of Advocacy, Matias Perttula-i, "Taküm-a USCIRF-i kasa onük benoktsü (CPC nung India züngsemstü) ta onoki imlar, iba dak alia Biden administration-i alima tesem ajaklen religious freedom atema inyaksü aser India ya CPC linük ta sangdongtsü imlar. United States leniba nung alima tesem ajaklen aser mapang ajak nung religious freedom atema inyaksüla," ta metetdaksü.

ANOGO ABEN TSÜNGREM DEN

Kibuba tashi nung amangdi

"Kibuba tenüngji tashi tait mitsa; temeshipur ajagi asüma ayir aser kümzüka alir." A. Shin 18:10

Alemli otsüla-oboula nunger mapang yim ka tsükchir ket nungi kümzüka yutettsü atema yimti tezülen mesüra süngküm anasa mitsa yanglur idakji mitertemi tsükchir arur marur repranga yimti nuka ataa liasü, iba jagi yimti nüburttem yimmaker lendong nungi aiben kümzüka aru. Amangbapur ka asoshi pei miim (secret) tamang kümzüka ayudaki Kibuba tashi tait mitsa akümpokji lir. Tamanger ka shibai pei tamang Kibuba tashi nung teti metaloker aser Kibuba tashi angutsü meita alir pa/laji temoatsü. Tamajungbai pa kodanga mesemdangtsü mesüra pa/la anema marutsü kechiyong Kibuba tashi nung parnok teti kümzüka lir.

Dawid ya Tsüngrem dak mulung toka amanger ka liasü, kechiaser pai pa tamangba tashiji pa yanglusang nungi dang angur ta taküm nung jangja meteta ali, yongji pai "Kibuba kü long, aser kü mitsa, aser kü kümzüka; kü Tsüngrem, kü lung, shiba dak ni jenoker. Pa kü jong, ni kümzüka jangzü, kü tashi tait mitsa" ta Kibuba indang jembiba kuli angur. Dawid ama amanger ka yimya nung Tsüngremi asen taküm nung anogoshi teyari mapatem inyakba indang shisadanga Pa nüngsangba nung anogo süitema yoktetba tamanger ka na aser ni südi.

Sarasadem

Oh Tsüngrem, tanü anogoa ne tashi tait mitsa nungi mepilai kümzüka litetba amangbapur ka asütsü kü nem tangatetba tashi kua. Amen

Caribbean nung volcano agi kongshirtem Baptist Arogoi yarir

April 16, 2021: Caribbean mitzü yimzüka aluba ajanga nung volcano lendong atalokba süngolio aser ki aika sülen pastor, Rev. Cecil Richards leniba nung sülen Khristan tentet aikati Kingstown Baptist Arogoi St. Vincent nung alirtem yaridar. United Methodist arua jenoka alirtem yaridar. Committee on Relief otongdar,

Hokolbarnü (April 9) Dan Curran-i, "Tang iba mezüng volcano lendong lendong agi kongshirtem atalokba sülen Arogoi shelters shelters balala nung jenoka lir, aser item shelters aika Arogotem nung lir," ta ashi.

Florida nung amenoka aliba Food For The Poor organization aser Orthodox Jewish organization, Chabad-Lubavitch natia supply balala bendena agütsüdar. Ano Primate's World Relief and Development Fund-i Arogotem den longjemer St. Lucia aser Grenada na nung tenla bendena timtemertem yaridar.

Taoba mapang nung Bartow Baptist Association, Georgia-i team balala yoka iba asetkong nung vacation Bible school agiba den Arogo asentenshiba sentongtem agia liasü, aser tang parnokisa tenla bendena St. Vincent nung timtemertem yaridar.

Caribbean island anüdoklen nütsüng 100,000 shi lir aser iba nungjagi nisung 16,000 nungi 20,000 shibo tangaleni aienshidaksüogo, ta UN-i metetdaksü.

National Emergency Southern Baptist Management Organization-i ashiba agi, nisungtem jenokdaksütsü atema shelters 87 lapokogo aser item shelters nung nisung 3,800 dak tema jenoka lir.

La Soufrière volcano nungi hygiene supplies agütsüdar.

OLONG PAITEP # 5784

1		2				3		4		5
				6						
	7		8							
9					10			11	12	
			13			14	15			
16					17			18		
					19		20			
21		22								23
24										
							25			

TIPILEN		LANGTSÜNGLEN	
1. Saku	- (4)	1. Taksep	- (3)
6. Songjen	- (7)	2. Langtem	- (5)
7. Mali/Tazüng	- (4)	3. O tamendaktak	- (4)
9. Tasen apok	- (6)	4. Nütsü tebuba	- (3)
11. Songtem	- (3)	5. Anüngdang tesangwa	- (3)
13. Ata liasü	- (5)	6. Apitet	- (5)
16. Tzünglu den külemi tsüker	- (3)	7. Yagi jungdaksür	- (4)
17. Aso tila	- (6)	8. Anogo semer ka	- (3)
20. Tashi maküm	- (4)	10. - - - tatsü	- (3)
24. Tenüng kasa jatepba	- (7)	12. Tebur kidong aser zünga	- (4)
25. Ki yangluba oset	- (4)	kasa tsüngda jatepba	- (4)
		14. Pela agizükba tapu ka	- (5)
		15. Tenüng atet	- (3)
		18. Mejanga onü	- (5)
		19. Talak techira	- (4)
		21. Maneni	- (3)
		22. Nübo teyi	- (3)
		23. Meshi	- (3)

OLONG PAITEP # 5783 TELANGZÜBA

TIPILEN :	LANGTSÜNGLEN :
2. Anükalem, 4. Mesak, 5. Apet,	1. Kumdang, 2. Ayak, 3. Leptep,
9. Meimtep, 11. Posü, 12. Patak,	6. Sati, 7. Yiar, 8. Sangküm, 9. Metsük,
13. Tekettsü.	10. Mazü.

Second 30 tsüngda iba ongo ya inyaktettsü asü ?

+ + = 30

+ + = 20

- = 7

+ x = ?

TANÜBO NAI LANGZÜANG

Q. Koba küm NGC 7371 ngutet?
 A. 2015 B. 2014 C. 2013 D. 2012
 (Taruba adok nung onoki langzüsü)
YASHI ADOK TELANGZÜBA : September 2021

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Ber¹
 (n.)Tsük aser jang nungi tsüksü aser wanu bendangba oset (winnowing tray)
 * Asenoki ber agi tsük aser jang asef ashitsüla.

Ber²
 (n.)Ali nung juzüa senzüba shiruru (snake)
 * Ber dak mim lir.

NAI-A YA METETTER MA?

APRIL 17 NÜ ASOR TONGTIBANG NISUNG KAR

- American industrialist & financier J.P. Morgan - (1837)
- Indian Politician Chandra Shekhar (1927)
- Indian former cricketer Dinesh Mongia (1977)
- Baseball Hall of Fame member Cap Anson - (1852)
- Actor William Holden - (1918)
- Music promoter Don Kirshner - (1934)
- Musician Jan Hammer - (1948)
- Actor Olivia Hussey - (1951)
- Actor Sean Bean (1959)
- Singer Maynard James Keenan (Tool, A Perfect Circle, Pucifer) - (1964)
- Actor Henry Ian Cusick - (1967)
- Singer Liz Phair - (1967)
- Actor Jennifer Garner - (1972)
- Singer/model Victoria Beckham - (1974)
- Actor Rooney Mara - (1985)

SUDOKU # 5827

			3	5	9					
	2									
		1		8	4					
7						9				
3			5	7						
	5		9	4	2					
5	4	9				1	3			
		3	2	1						
		6	4							

TELANGZÜBA # 5826

8	1	4	3	7	2	6	9	5
5	9	2	1	6	4	3	7	8
6	3	7	8	9	5	4	1	2
1	6	5	9	3	8	7	2	4
4	7	8	6	2	1	9	5	3
9	2	3	4	5	7	1	8	6
3	4	1	2	8	9	5	6	7
2	5	9	7	4	6	8	3	1
7	8	6	5	1	3	2	4	9

OJANG LUTEP # 5371

ÜRURJATSBI	:								
ASIRHT	:								
EASÜMR	:								
ASMIRH	:								
ÜYASGJONIA	:								
HRTEIRNCUMI	:								
NOARKP	:								
MMEIA	:								
KUAMÜÜBUTTSS	:								
NERNÜAKGD	:								

OJANG LUTEP TELANGZÜBA # 5370

TANGAR DANG NUNGI BALAKA ALIRTEM NEMJIBO
 NÜBURI TENÜNG BALAKA JALOKTSÜR

TAN HOPTA ATEMA - KOMA SÜLA ?

Q. Tang Nagaland nung government medical doctor-temi akangba ama, parnok kisüng atema, parnok govt mapa nungi anentsü asoshi tasoba küm 60 aliba nungi 65 kümtsü nunga koma süla ?



Mumbai, April 16, 2021: Hokolbarnü Mumbai nung aliba slum area tulutiba- Dharavi nung health worker kati covid tendangtsü atema samples bendenba noksa nung angur. Hokolbarnü India nung nisung 2,17,353 dak coronavirus putet aser linük nung iba tashidak timtiba putetba state ji Maharashtra (61,695) lir.

India nung ano nisung lakh 2.17 dak Covid putet aser 1,185 asü

New Delhi, Rongchii/April 16 (Agencies): Tanü agi anogo ananübuba India linük nung nisung lakh 2 tema dak coronavirus tashidak putetogo; tesüiba ghonda 24 tsüingda linük nung nisung 2,17,353 dak coronavirus putet aser nisung 1,185 süogo, ta Hokolbarnü Union Health Ministry data ajanga metetdaksü.

Tang tashi nung India nung nisung ajak agi 1,42,91,917 dak iba tashidak putetogo.

Tesüiba anogo ka tsüingda iba tashidak agi nisung 1,185 asüba densemabo nisung ajak agi 1,74,308 süogo, ta tanep 8:00 ako nung Health Ministry-i metetdaksü.

Tesüiba anogo 37 tashi

linük nung anogo shia nisung timba-timba dak iba tashidak putetdar aser iba tashidak agi teshirangdakpurtema timba-timba kümdar; tang linük nung iba tashidak agi teshirangdakpir 15,69,743 kümogo.

Linük nung coronavirus tashidak agi shiranger anepba shilem ajema 87.80 dang kümogo, iba tashidak agi shiranger ajak agi 1,25,47,866 anepogo aser iba tashidak agi shiranger asüba shilembo 1.22 dang kümogo, ta kasa osang ajanga metetdaksü.

ICMR-i ashiba agi, April 15 tashi nung linük nung samples ajak agi 26,34,76,625 tendangogo aser iba nungji

Brihostibarnü samples 14,73,210 tendangba densema lir.

Tesüiba anogo ka tsüingda India nung iba tashidak timtiba putetba state ji Maharashtra (61,695) lir, iba sülen Uttar Pradesh (22,339) aser Delhi (16,699) na lir.

Tesüiba ghonda 24 tsüingda linük nung coronavirus tashidak agi asür 1,185 nungjagi Maharashtra nung 349, Chhattisgarh nung 135, Delhi nung 112, Uttar Pradesh nung 104, Gujarat nung 81, Karnataka nung 66, Madhya Pradesh nung 53, Punjab nung 50, Rajasthan nung 33 aser Tamil Nadu nung nisung 29 asüba densema lir.

Taküm tzüingluruwa mongpu nung tzüinglu junga arutsü: IMD

New Delhi, April 16 (Agencies): India nung tzüinglu aruba shilem 75 bo Southwest tsütsü tzüingluruwa mongpu ajanga lir, aser taküm tzüingluruwa mongpu 'normal' asütsü, ta Hokolbarnü India Meteorological Department (IMD)-i metetdaksü.

Long Period Average (LPA) ji shilem 98 asütsü, ta Ministry of Earth Sciences Secretary, M Rajeevan-i osangbenertem nem metetdaksü.

Video conferencing ajanga osangbenertem senden ka nung

June ita nungi September ita tashi ita pezü indang Long Range Forecast sangdongba mapang Rajeevan-i, "Ajisüaka Odisha, Jharkhand, anüdoklen Uttar Pradesh, Assam aser Meghalaya state tem nungbo tzüingluruwa 'normal' den tajemba asütsüa akok," ta ashi.

"Tzüingluruwa mongpu ji LPA nungi shilem 98 asütsü, aser ibaji 'normal' lir. Iba ya linük atema osangtajung, kechiyong iba ya ajanga India nung alu nungi aonsotsü jenti züsentettsü," ta Rajeevan-isa metetdaksü.

Tang coronavirus wara ajanga linük rongsenkettsüing jenjang mejungi aliba mapang ka nung tzüingluruwa normal asütsü ta asadangtetba ya osangtajung ka lir, kechiyong India nung rongsenkettsüing tamendakdakji aluyimba aser iba den sendaktepba sectors lir.

Rajeevan-isa, India Meteorological Department (IMD)-i maneni ita sasep nung region pezü- Northwest India, East & Northeast India, Central India aser South Peninsula nung tzüingluruwa osang ita shia metetdaksütsü, ta ashi.



Kolkata, April 16, 2021: Honibarnü West Bengal nung Assembly elections shilem 8buba agitsü lia Hokolbarnü Kolkata nung Polling officials-i election duty aotsü atema EVMS agizükba noksa nung angur.

Taoba mapang CBI Director, Ranjit Sinha süogo

New Delhi, April 16 (Agencies): Taoba mapang Central Bureau of Investigation (CBI) nung Director, Ranjit Sinha Hokolbar anepdang alima nungi pilaogo; pa arrshi küm 68 liasü.

Brihostibar aonung pa dak coronavirus tashidak puteta liasü aser Hokolbar anepdang 4:30 ako nung pa alima nungi pila, ta ketdangsertemi metetdaksü.

Sinha ya 1974-batch officer, Bihar cadre liasü aser pa arrshi küm 21 asüdangyongi pai UPSC examination nung takok angu. 2012 küm pa CBI Director aküm.

Tamalen pa Indo-Tibetan Border Police (ITBP) force aser Railway Protection Force nung tongti liasü. Pa küm 40 dak tema police service nung aliba mapang nung pa Patna aser Delhi na nung CBI nung menden balala nung tongti ketdangser liasü.

ITBP-i sangdong ka ajanga,

"Tanü ITBP nung taoba mapang DG, Ranjit Sinha alima nungi pilaba atema DG aser ITBP pur ajaki mangyimer. September 1, 2011 nungi December 19, 2012 tashi pa ITBP nung DG aser ADG inyaka liasü. Pai mongin süa inyakba aser pa dak lenisüba sempet alibaji teti bilemettsü," ta metetdaksü.

Indian Institute of Public Administration nungi M.Phil agir, Sinha ya kaket kanga sapua azünger ka aser zülur ka liasü, aser pai osangkaket aser magazines atema mapang shia police dak sendakba onüktem nung osettem zülüja liasü.

Police Medal for Meritorious Service aser Distinguished Service atema President's Police Medal angusang, Sinha-i Ranchi, Madhubani aser Saharsa district tem nunga SSP inyak aser Bihar nung Maoists telungpurtemi timtem agütsüba Magadh Range nunga DIG inyakogo.



Ranchi, April 16, 2021: India nung coronavirus tanaben prokba mapang Ranchi, Jharkhand nung aliba Rajendra Institute of Medical Sciences (RIMS) hospital nung coronavirus agi shirangertem yipten agi meperiba agi yipten lemsatepa agiba noksa nung angur.

WB Election: candidate trok dak Covid putet; kabo süogo

New Delhi, April 16 (Agencies): West Bengal Assembly elections nung tokteper candidate trok dak coronavirus putet aser kabo süogo, tanüingba pongu nungjagi asem Trinamool Congress (TMC) nungi aser Revolutionary Socialist Party (RSP) aser Bharatiya Janata Party (BJP) na nungi candidate kaka lir, ta Hokolbarnü health department ketdangser kati metetdaksü.

Bodhbarnü RSP nungi candidate arrshi küm 73, Pradip Kumar Nandi dak coronavirus putetba sülen tang pa kidang mongdar, ta ketdangseri ashi.

Matigara-Naxalbari menden nung tokteper BJP candidate, Anandamay Barman (arrshi küm 38), TMC nungi Goalpokhar menden nung candidate, Mohmmmed Ghulam Rabbani, Tapan candidate Kalpana Kisku, aser Jalpaiguri nungi candidate Dr Pradip Kumar Barma nungger dak-a coronavirus putetogo, ta ketdangserisa metetdaksü.

"Coronavirus puteta aliba

candidate tem dang election nüboyim sentongtem nung shilem agiba anenang ta tuyuogo. Parnok kidang kija amongtsüla mesüra temang manemba apir hospital nung amongtsüla, ta metetdaksüogo," ta paisa ashi.

Ano külen Murshidabad district kübok Samsherganj assembly constituency nungi Congress Party candidate, Rezaul Haque bo Brihostibarnü (April 15) nija hospital ka nung monga lia coronavirus tashidak agi süogo.

Brihostibarnü West Bengal nung nisung 6,769 dak coronavirus putet aser kasa anogo nungsa iba tashidak agi nisung 22 süogo.

West Bengal nung Honibarnü (April 17) election shilem pongububa agitsü aser iba election nung candidate 342-i tokteptsü. Constituency 45 kübok Polling station 15,789 nung election agitsü.

State nung shilem 8 lemsar assembly elections agir; April 29 nü election tembangtsü aser May 2 nü vote zünga election osang sangdongtsü.



Rio de Janeiro, Brazil kübok Petropolis nung police ketdangsür Everaldo Pinto-i superhero Captain America ama sübütsü sübur tanurtem teka nung COVID-19 mesen tepsettsü asoshi alcohol inoktsüba noksa nung angur. Pinto-i tanurtem dang COVID-19 nungi jenbua alitsü asoshi yimyatem sayu aser parnok nem mürekmejuba oset aser face mask lema agüja liasü.

Indianapolis, US nung nisung ti khaset

Indianapolis, Rongchii/April 16 (Agencies): United States indang Indianapolis yimti kübok FedEx facility nung prangbong bena alir kati nisung ti khaset aser pasasa pa khaset, ta police-i ashi.

Brehostibar aonung Indianapolis International Airport anasa iba tesem nung lendong atalokba mapang nisung aika yirua liasü, ta police odongtar Genae Cook-i ashi.

Nisung pezü mozüki nung lir, aser parnok rongnung ka kangasa mejungi yirur lir. Nisung ana iba tesem nung anepalur yok, ta Cook-i ashi.

Nisung khasetsang ya ano mejangjatet aser bushisüngdang teme osang-tsüsang bendenba mapang lir.

Nisung khasetsang ya iba facility nung mapa inyaker asü masüar ashitsü ano kerara, ta pai ashi.

Aonung 11:00 ako (par

mapang) sülen injang akhaba osang ka police dangi aru, ta Cook-i ashi.

"Onoki iba lendong indang kuli tejangja bushitsü meranger," ta pai ashi.

FedEx ajanga sangdong ka nung parnok ketdangsür den yariteper aser osang tali bushitetsü asoshi inyaker, ta ashi.

"Indianapolis airport anasa FedEx Ground facility nung lendong atalokba onoki meteta lir. Nüburtem kumzüka ayutsü mezüing sür inyaker, aser iba lendong agi kongshirtem den onok sarasadem lir," ta sangdong ajanga ashi.

FedEx nung inyakertem mapa inyakba mapang phone mamshidaktsür, anungji parnok den osang agiteptsü asaker, ta nisung kari ashi.

"Nisung ka submachine gun ama automatic rifle ka amer liasü aser pai tabi agi injang

khaloktsü," ta yangji inyaker Jeremiah Miller-i ashi.

Indiana nungi US Congress züngsem Andre Carson-i Twitter nung, "Indianapolis nung aliba FedEx facility nung nisung khasetba asoshi ni temolung raksar aser iba lendong agi kongshir alir ajak asoshi sarasademtsür," ta zülutsü.

"Lendong atalokba osang tejangja ajak angutsü asoshi yangji aliba ketdangsürtem den osang agiteper aser timtem ajurua alirtem den akokba agi yariteptsü kü office renema lir."

Taoba ita southern California nung tanur ka densema nisung pezü tashi office aliba ki ka nung khaset.

Boulder, Colorado nung aliba chiyongtsü ayokdak dokan ka nung March 22 nü nisung ter khaset.

Küm shia United States nung prangbong agi nisung 40,000 jungnüa asür.

Democracy busema longkak aitba mechi Jimmy Lai tepuokdak ayutsü

Hong Kong, Rongchii/April 16 (Agencies): Hong Kong nung democracy busemer aser takataiter Jimmy Lai ya temelaba melie nisung adenshiba ken o nung aibelea aliba ajitetba sülen ita 14 tepuokdak ayutsü obendang agütsüogo.

2019 küm democracy busema longkak aitba dak sendakba nung ken o benoka aitsür Hokulbarnü obendang agütsür activist ishika rongnung Lai ya dena liasü.

Arishi küm 73 tain Apple Daily tenzüksang ya Beijing kanga sashia anemer ka lir.

China-i Hong Kong temeden tali azüoktsü merangba mapang ka nung iba obendang ya agütsü.

2019 küm August 18 aser 31 nü longkak aitba nung shilem agiba mechi danga activist tem nema Hokulbarnü temerenshi agütsü. Item rongnung arishi küm 82 tain campaigner Martin Lee aser arishi küm 73 tain Margaret Ng densema lir.

Hopta tetenzüklen Lai indang Apple Daily osangkaket ajanga pai tepuokdak nungi teka agi züluba shidi ka adokja liasü,

kong "Ochi temeden bushitsü ya osangbener ka ama asen mapa lir. Tim masüba yimya agi asenok memesüzük tashi, temenen nem asen mokokdaktsü tashu asenoki asen mapa inyaktsü," ta zülua liasü.

August 18 nü longkak aitba mechi Lai ya ita 12 tepuokdak ayutsü aser ano August 31 nü longkak aitba mechi ita ti tepuokdak ayutsü. Ajisüaka pa ya ita 12 bo tetsünga makai tepuokdak ayutsü, ta obendangeri totuyuba agütsü. Taoba mapang ozüing yanglur Lee Cheuk-yan ya anogo ananü longkak aitba mechi tepuokdak ayutsü.

Jimmy Lai anema ano ken o trok benoka lir, aser item nungi anabo linük indang National Security Law tasenba kübok benok, kong aitsüra taküm tepiyonga tepuokdak ayutsü.

China-i taoba küm Hong Kong nung benokba ozüing kübok sorkar den madenba aser sorkar nem tetsükdaktsü agüja inyaksangshiba aitsür. Ita tetenzüklen Beijing-i Hong Kong electoral ozüing melenshija lir.



Manila, Rongchii/April 16 : Taguig City, Philippines nung COVID-19 mozü agitsü tesem ka m e s e m t e t a alidak April 16, 2021 nü tetsür ka Sinovac COVID-

19 mozü agiba mapang tangokba noksa nung angur. Hokulbarnü nisung tasen 10,726 dak COVID-19 tashidak jangjatet, ta Philippines' Department of Health (DOH) ajanga ashi. Tang iba Southeast Asia linük nung COVID-19 agi nisung 914,971 menepogo aser nisung 15,738 süogo, ta DOH ajanga ashi.

Myanmar mitkar anemertemi sorkar tentetba sangdong

Naypyitaw, Rongchii/April 16 (Agencies): Myanmar mitkar anema nokdaker temi Hokulbarnü National Unity Government ka sangdongogo, kong parliament züngsem nungi atsüngdoker alirtem aser mitkar tashi amshia sorkar atsüngdokba anema longkak aitba lenirtem aser ethnic kin tila nungi dena lir, aser ibai mitkartemi yimsü asüba laodaktsütsü aser democracy tanaben amenotsü nükjidong nung lir, ta ashir.

February 1 nü mitkartemi tashiyim amshia Aung San Suu Kyi-i aniba civilian sorkar atsüngdokba sülen Myanmar nung azüdokshia rongrong nung lir. Suu Kyi'er teloki küm pongu tashi yimsü sür November election nung takok ngua ano kümsük tanabuba tenzükdang mitkartemi menden nungi atsüngdoka liasü.

Security forces temi tashiyim amshiaka anogoshi nüburtemi democracy tanaben meshia yimtung nung longkak aita arur, kong nisung 700 dak tema tepsetogo, ta telok kati ashir.

Kasa mapang Suu Kyi'er

telok nungi parliament nung atsüngdoker aliba züngsemtem densema yimten yimsüsürtemi par linük aser alima dang mitkar tanishirtem masü saka parnok ang yimten yimsüsür tejangja, ta sayutsü meranger.

National Unity Government tentetba indang sangdonga minute ter jembiba video ka nung, "Imlibilema nübur indang sorkar agizükang," ta democracy activist tejen, Min Ko Naing-i ashi.

Telungjem sorkar ya nüburtemi aginüba saka mapa tulu lir, ta Min Ko Naing-i ashi.

"Asenoki iba ya tera nungi atsüteta indoktsü meranger, anungji asenoki bendanga agütsütsüla," ta pai mitkar lenirtem athishia ashi.

Suu Kyi'er teloki akokba November election nungya ashikülak mapa inyakba ajanga sorkar atsüngdok, ta mitkar lenirtemi ashir, saka election commission-i tai apuba magizüker.

Iba telungjem sorkar asoshi tongtipangtiba nükjidong kaji linük balalai par nungitsü aser

agizüketsüba ya lir.

Iba sorkar nung minister of international cooperation, Dr Sasa-i osangbener dang ashiba agi, United States aser Britain ajanga Venezuela opposition lenir Juan Guaido ya iba linük indang tetemjen lenir, ta agizüketa lir.

"Onok ya democratic yimya nung shimtetba Myanmar lenirtem lir. Anungji democracy aliba linüktemi asenok magizükra, iba tetetzü parnoki democracy magizüker ta sayur alitsü," ta Sasa-i ashi.

Myanmar mitkar dang linük balalai tashiyim amshiba anentsü ajungshir, talisa anüolen linüktemi tenokdangba kar agüja lir, saka mitkar lenirtemi mapang talangka nungi item ya aineri teka amoshitsü merangba ka amai züngshia arur.

Iba telungjem sorkari ketdangsür tenüngtem sangdongogo aser yangji ethnic kin tila nungi züngsemtem, longkak aiter lenirtem dena lir, anungji democracy busema nokdakertem aser autonomy bushiba kin tilatem lungjemba sayur. Autonomy bushiba kin

tilatem yagib küm aika central sorkar den rarayonga arua liasü.

Azüdokshi tatem kati arudaktsütsü, democracy tanaben arudaktsütsü aser "federal democratic union" ka yanglutsü nükjidong lir, ta Sasa-i osangbener danga shi.

Mitkartem ya mapang talangka nungi federalism atema tema tazütsü ka amai arur aser par sasa parnok ya linük tashi amshiba tiyongtsü ka ama bilemer.

Mitkartemi sorkar atsüngdokba anogo nungi Suu Kyi ya pua yua lir aser lai dangar den sensaksemba ya lar okatsürtem den jembiba kisüing lir, koba sepaitemi mita repranga atar.

Democracy busema yimten yimsüsürtem atema odongtar kati ashiba agi, telungjem sorkar ka tentetba atema la nem memetetdaktsü, saka tatalokbatem lai meteta alitsü imlar.

Yimten yimsüsürtemi telungjem sorkar indang sangdongba mapang mitkartemi yimsü asüba anema nokdaker

dangartemi asürtem mangyima kilung nung "silent strike" agi aser yimti kar nung süoshi sentsü tanak agir jaja liasü.

Yangon yimti nung yimtungtem kanga azüingmeyaker liasü, ta yangji alirtemi ashi.

Hokulbarnü azüdokshiba osangbo mali saka Brehostibar aonung Myingyan jila nung nisung ana khaset, ta Radio Free Asia ajanga ashi.

Mitkartemi parnok anemertem pua arur. Brehostibarnü kisüing nunga parnoki longkak aitba sentong ayonger tejangja nübu ana puogo.

Taoba maoang Ayeyarwaddy Federal Army ta nüngja agüja aliba telok katia Facebook nung, election ajanga shimtetba sorkar amenoktsü aser nüburtem kumzüka ayutsü asoshi mitkartem den raratsü, ta sangdong aser volunteer jaoka liasü.

Telungjem sorkar nung lenirtemi 'federal army' ka tentettsü tebilemba lir aser ethnic kin tila nungi telungpur telok den jembishinür, ta ashi.

Longleng nung telongjem senden ka agi

Longleng, Rongchii/April 16, 2021 (TYO): State aser District kübok Covid-19 wara tanaben adokba dak sendakba nung nüburtem atema tekümdangtsü meratem asadangshia aser sensaksem akatsü asoshi, Brehostibarnü (15.04.2021) DC conference hall, Longleng nung telongjem senden ka agiogo, ta sangdong ajanga metetdaksü.

Iba senden nung SDO(C) Longleng, Trongdiba Tongpi menden liasü.

Tongpi-i, district nung nisung kar dak Covid-19 tashidak putetba ajanga ki kar shibangja

lir aser iba nung sensorpitem maoksateptsü, saka lokti nung iba wara prokba azioktsü asoshi longjemmer inyaksüla, ta pai telok ayongzük.

Iba senden nung SOPs tetuyubatem talisa tejak nembangba mask inoktsü, social distancing aser shishilembaba tesem ajak nung teka metsüktsü atema sapon aser tongtibangsa hand sanitizer amshidaktsütsü asoshi oziung takang yanglutsü telok olemtepa liasü.

Iba den külemi, ward aser yimtsüing ajak nung Covid-19 wara dak sendakba tekümdangtsü osangtem

proktsü asoshi telok jembitepogo.

District Surveillance Officer, Dr. Maria Yaden-i, tanga State balala nungi District-i arurtem anogo 10 atema quarantine asütsüla, ta metetdaksü; aser item rongnung kar dak danga Covid-19 tashidak dak sendakba temaitsü aliba metetra District hospital nung aruagi tendangtsüla, ta lai ashi.

Iba senden nung ward ajak nungi teshimtet nübuyem, Arogo lennirtem, NGOs, DBs aser council chairman tem aruagi denogo, ta kasa sangdong nung shia lir.

Mon tensa asadanga DPDB senden agiogo

Mon, Rongchii/April 16, 2021 (TYO): Hokolbarnü (15.04.2021) Deputy Commissioner Conference Hall nung DC Mon Thavaseelan K IAS-i anir Mon District Planning & Development Board (DPDB) senden menogo, ta sangdong ajanga metetdaksü.

Iba senden nung MLA & Chairman DPDB Mon, N. Thongwang Konyak-i, Covid-19 wara tanaben adokba azioktsüsa lenmangtem asadangshitsü asoshi telok ayongzük. Iba den külemi State nunga iba tashidak tanaben pokteba dak sendakba nung shishaliok rejutem aser lokti adenshiba sentong/maparen shibangtsütsü atema State Level dangi tebilembatem benoktsü asoshi board dang asalentong yanglutsü ashi.

- Teküboklen agüja aliba asalentongtem State Level dangi abentsü Board bangjemtep :

i) Apiary ulushitsütsü atema senotsü teyari agütsütsü.

ii) Longphoah yimtsüing nung Medical Sub-Centre ka yanglutsü.

iii) Medical College Mon ya Chah-yo area Mon Village agi belentsü.

iv) Chen circle kübok Chingkao Nyaho Village nung Anganwadi Centre talila ka benoktsü. Social Welfare Departmental inyakyim renema inyakba sülen, ADC Aboi, Chumlamo Humtsoe NCS ajanga lemsatepba asalentong

ya State Sorkar dangi benoktsü teloki mulungtep.

v) Angiangyong aser Tobu nung Eklvya Model Residential School (EMRS) yanglutsütsü. DC-isa, Ministry of Tribal Affairs ajanga EMRS Longwa atema senotsü teyari agütsütsü, ta metetdaksü.

vi) Tetsürtem atema Model College anepalutsü telok jembitep. Iba College atema KNSK President, Ponglem Konyak-i tebilembatem telok den lemsatepa liasü aser iba College atema tesem jangjatsüogo, ta pai ashi.

vii) Kidang shirur aser an metsüba ajanga tetsür aser lanur tem atema pei sasa rongsen lenmang bushitsü mapatong tem yanglutsütsü. Iba dak sendakba nung, Chief Veterinary Officer Mon, Dr. Vilatuo Rutsa-i, District nung shi (meat production) peria manguba indang tebilemstü lemsatep. Iba mapatong mezüing shilem nung, kilen 1450 nungi tetsür aser lanur 30 nungi 50 tashi nem maongka agütsütsü, ta pai metetdaksü.

Tawa, Tobu tesem nung temaitsü kecha melii ak asüba indang nung Dr. Rutsa-isa jembitep aser iba ya metettsü atema sample tem Bhopal-i yokogo, ta pai metetdakja liasü.

viii) Mount Longnam School Longching nung class VII bendenloktsü asoshi telok jembitep.

Kasa DPDB senden nung teküboklen agüja alibatem

PowerPoint ajanga metetpeladaksü:

i) Permaculture indang ECS tenüing nung Vishak-i agütsü

ii) Principal, Wangkhao College Mon, Wati Imchen-i, NAAC accreditation jenjang ajangzüktettsü asoshi College nung timtem aser tayongzükba balala ajuruba indang lemsatep.

iii) PWD(R&B) Mon indang Executive Engineer aser Executive Engineer of Power temi pei pei tata inyakyimtem metetdaksü.

Maneni, DIO Mon, Shasinle Tep-i, District nung Covid vaccination drive indang telok dang metetdaksü, kong mezüing shilem nung nisung 8,763 aser shilem tanabuba nung nisung 2,303 nem Covid-19 Vaccine agütsüogo.

Tep-i ashiba agi, tang iba District nung Vaccination Centres 18 lapoka lir aser April 16, 2021 nungi tenzüka Centre 36 tashi akümtsü.

Public aser nija Office anaprongla nung Covid Vaccination Sessions achayanga agütsü sentong lir asünung, iba Covid-19 Vaccination drive takok ngua agitettsü atema, Department den amalitepa inyaksü asoshi Tep-isa telok dang mepishiogo.

Iba senden nung SP Mon Imnalensa Ao IPS, Administrative Officers aser District HoDs den DPDB indang züngsemtem denogo, ta kasa sangdong ajanga metetdaksü.

MULUNGNEŊ

Onoki teti meima aliba tsürabur asür **Likokmar Imsong**, mapang tatsüka temang nung mekokmein aliba mapang nungi tasüba anogo tashi temeimer shirnokisa sarasadem, nübo aser rongsen balala agi yaritepogo, nenok ajak dang kanga pelaba lemsateper.

Tsüngremi nenok ajak maneni talubosa moajangma.

~ Temeim Kinungtsü aser Chirmur.



TASOBA : 1959
TASÜBA : 05.04.2021

OFFICE OF THE CHANGKIRI KIDONG KOHIMA

Dated: 16th April 2021

TENÜNGSANG AGÜTSÜR

Dr. Moakala Changkiri, Scientist (Assistant Agronomist), AICRP (VC), Dept. of Horticulture, SASRD, NU, D/o Shri. Limasüingba Changkiri, lai teküboklen agüja aliba Award-tem ajangzüktetba ajanga kidong nem konang bener arutsüba atema Tenüingsang agütsür:

- "Women Scientist of the Year Award-2020" in the 4th International Conference on "Global Approaches in Natural Resources Management for Climate Smart Agriculture (GNRSA-2020) during Pandemic Era of Covid-19" organized by Agricultural Technology Development Society (ATDS), Ghaziabad, U.P. held at Meerut, U.P. during 26-28th February 2021.
- "Young Scientist Award" in the International Seminar on "Agricultural Sustainability for doubling Income in changing climate Scenario and market challenges during Covid-19" organized by University of Allahabad Prayagraj, U.P. during 10-11th April 2021.

Maneni, la tarutsü mapatem ajak nung takokba lidakjangma aser tulusang Tsüngremi la nem anema aliba, arishi anogo talang moatsüba den la shisatsü asen Linük aser Alima ajunga renoktsü atema tali awaa amshidakjangma.

Sd/-
(TEMENDANGBA CHANGKIRI)
President

Sd/-
(TEMJENTENZUK CHANGKIRI)
Secretary

OFFICE OF THE DIMAPUR MOPONGCHUKET MEJENSANGER TENÜNGSANG AGÜTSÜR

Wb. M. Nungsang Aier aser Wt. Talirena Jamir na jabaso Tamsükaba Aier Ao Kaketshir Telongjem, Dimapur (AKTD) nung 2021-23 Tir inyaksü shim nung Dimapur Mopongchuket Mejensanger pelar aser pa nem tetushi aser tenungsang agütsür.

Nü lenisüba nung AKTD maparen ajak takok ngua bener aotsü onok sarasadem.

Sd/-
Jongshitemsü Jamir
President

Sd/-
Imotemjen
Secretary

ALIAYOKER

Old Showuba area near Four Lane
1. Per Sq.ft. Rs. 90 2. Per Sq.ft. Rs.150
9856603713 / 9362576107

Microsoft Surface Laptop 4 sayaogo

New Delhi, Rongchii/April 16, 2021 (Agencies): Redmond, Washington nung amenoka aliba tech company tetsüti - Microsoft-i US, Canada aser Japan nung Microsoft Surface Laptop 4 sayaogo.

Iba Microsoft Surface Laptop 4 ya Surface Laptop 3 den tatongtep alitsü, koba 2019 küm October ita saya liasü. Microsoft Surface Laptop tasenba nung Intel aser AMD configuration inoka yanglutsüogo aser laptop ya tasazük ana - 13.5-inch aser 15-inch nung angutsü.

Surface Laptop 4 anaprongla touch enabled' alitsü aser Windows Hello face recognition dena lir.

Iba laptop nung aluminium frame den alcantara mesüra metal palm rest options angutsü.

Microsoft Surface Pro 13.5-inch jenjang \$999 (sen 75,000) aser 15-inch variant jenjang \$1,299 (sen 97,500) alitsü.

13.5-inch variant ya sentsü ana - Ice Blue aser Platinum; den 15-inch variant ya Matte Black aser Platinum sentsü nung angutsü. Iba laptop ya mezüing US, Canada aser Japan linük nungang ayoktsü. Tanga shishilembadak iba laptop sayatsü asoshi company ajanga osang

tejangja magütsü.

Surface Laptop 4 ya Windows 10 ajanga achayangtsür aser tasazük ana - 13.5-inch den 15-inch nung angutsü.

13.5-inch model nung 10-point multi-touch enabled PixelSense display den 2256x1504 pixels resolution, 201 ppi pixel density aser 3:2 aspect ratio inoka yanglutsüogo. Ano külen, 15-inch model nung 2496x1664 pixels resolution den 13.5-inch model ama pixel density aser aspect ratio kasa angutsü.

Microsoft Surface Laptop 4 - 13.5-inch model nung 11th Gen Intel Core i7 processor aser Intel Iris Xe graphics mesüra AMD Ryzen 5 processor den AMD Radeon graphics shimtsü akok.

Maneni, 15-inch model nung Intel Core i7-1185G7 processor mesüra AMD Ryzen 4980U chipset angutsü. Iba Surface Laptop 4 nung 32GB LPDDR4X RAM aser 1TB SSD storage inoktsüogo. 13.5-inch model laptop nung agüja aliba 47.4Whr battery ya ghonda 19 aser 15-inch model nunga kasa battery ya ghonda 17 ser tesadangka tashi amshittetsü.

'Indiana Jones 5' nung Mikkelsen denogo



Jones 5' cast rongnung Mads Mikkelsen anisemogo.

Arishi küm 55 tain actor Mads-i Harrison Ford aser Phoebe Waller-Bridge na den külemi iba series indang installment pungobuba nung shilem agiba angutsü.

Mezüing installment ama Harrison-i archaeologist Jones ama shilem agütsü, saka Phoebe aser Mads role dak sendakba aser film osang memetetdaksü.

Steven Spielberg melena

James Mangold-i iba film director asütsü. Nüngtugu film yanglur Steven-i producer shilem nungang temulung agüja inyakkaki. Ajisüaka, John Williams, shibai film series ajunga nung inyakogo, pai tanaben installment tasenba nung inyaksü.

John-i Indiana Jones indang nüngtugu theme mejema liasü.

Taküm tsüklawa mongpu mapang iba film tangok tenzüksü imlar aser 2022 July ita iba film sayatsü sentong lir.

New York, Rongchii/April 16, 2021 (Agencies): Nüngtugu franchise indang installment tasenba - 'Indiana

Asian Wrestling Championship: Vinesh, Anshu aser Divya nungeri gold angu



Almaty, Rongchii/April 16, 2021 (Agencies): Hokolbarnü, Asian Wrestling Championship 53kg category - final tetoktepba nung, Olympic nung shilem agitsü asoshi quota ngur alila India tsür wrestler Vinesh Phogat-i gold medal nguogo.

53kg category final asaya nung Phogat-i point ka danga melalui iba title ajangzüktet.

Tesüiba küm ishika tejakdang nungi Asian asayamung nung Vinesh-i tenetben tashi takok ngudanga lir. Item medal rongnung lai silver medal asem ngua lir aser tan asayamung nung lai mezüing gold medal angur alitsü.

Hokolbarnü, mezüing aser tanabuba bout nung lai technical superiority ajanga Mongolia tsür Otgonjargal Ganbaatar aser Taipei tsür Meng Hsuan Hsieh tsükdaksü. Korea tsür Hyunyoung Oh yirurba ajanga semi-final nung lai shilem magitet.

Vinesh, shibai 2020 küm Delhi kübok ayongba kasa Continental championship asayamung nung bronze medal takok angu, final tetoktepba nung lai point 6-0 ajangzüktet.

Ano külen, kasa asayamung 57kg category asaya nung Anshu, shibai tesüiba anogo ishika tejakdang Olympic quota angu, la-a iba asaya telemsa final tongtet.

Arishi küm 19 tain Anshu-i semi-final tongtettsü atema, mezüing bout ana nung lai technical superiority ajanga Uzbekistan tsür Sevara Eshmuratova aser Kyrgyzstan tsür Nazira Marsbek Kyzy tsükdaksü.

Mongolia tsür Battsetseg Altantsetseg aser Anshu semi-final asaya liasü. Referee ajanga 'victory by caution' agütsüba mapang, Anshu point 9-1 agi tejakdang ser asaya aser referee-i asemben tashi Battsetseg nem tekümdangtsü

agütsü.

Külem India tsür Sakshi Malik-a final tongtogo. 65kg category tetoktepba nung Sakshi-i takok ngua shilem agidar.

Trials asaya dang nungibo Sakshi-i bout nung tajungba shilem agiba asadangteter. Rio Games nung bronze medal takok angula, Sakshi-i technical superiority ajanga mezüing bout ana takok angu aser Korea tsür Hanbit Lee temekok yirur asaya nungi tukadokba mapang point 3-0 agi Sakshi tejakdang ser asaya liasü.

Sakshi-i Mongolia tsür Bolortungalag Zorigt den final asayatsü.

Maneni, 72kg category tetoktepba nung, Divya Kakran-ia junga shilem agidar. Lai Asian Champion (72kg category nung) Kazakhstan tsür Zhamila Bakbergenova madak 8-5 agi koka round tasembuba tongtet.

IPL nungi Ben Stokes tukadok

London, Rongchii/April 16, 2021 (Agencies): Tang India nung tasayadak aliba Indian Premier League (IPL) nung, Brehostibarnü Rajasthan Royals tenüing nungi asayaba mapang England all-rounder Ben Stokes temeyong yirurba sülen, ita asem jungnüa tashi pa iba asaya nungi agiena atatsü, ta Hokolbarnü England aser Wales Cricket Board (ECB) sangdong ka ajanga metetdaksü.

Brehostibarnü Stokes-i X-ray aser CT scan agiogo, kong pa temeyong teret raksar aliba sayu, ta ECB-i ashi.

Leeds nung surgery agitsü

atema Hombarnü pa England-i meyipa aotsü, ta ECB-i shisem.

England aser New Zealand tsüingda 'Test series' ana June 02, 2021 nungi tenzüksü terenemba lir. Iba mapang Stokes-i külem team pur den asayatsü teimla kangarabo mali.

Stokes, shiba all - rounder Cricket asayar tajungtiba rongnung tanabuba lir, Brehostibarnü Rajasthan Royals aser Punjab Kings na IPL asayadang Chris Gayle-i zükloksüba ball ka 'deep off' tsütsü ajepzüksü merangba mapang pa temeyong yirurba liasü.

Harmanpreet Kaur 'COVID-19' nungi taneptsü nguogo

New Delhi, Rongchii/April 16, 2021 (Agencies): India tetsür T20 captain Harmanpreet Kaur, shiba dak coronavirus tashidak puteta liasü, la iba tesashi wara nungi taneptsü nguogo.

Hokolbarnü, Kaur-i la COVID-19 tashidak nungi taneptsü anguba osang sangdonga liasü.

Tesüiba hopta ana tejakdang Harmanpreet dak Covid-19 positive putet aser March 30, 2021 nü lai alima dang iba osang lemsatepa liasü. Kidang quarantine süa anepalua aruba sülen la indang RT-PCR report nung negative sayuogo.

"Coronavirus wara nungi taneptsü anguba den kü temang tang tajungba lir ta pelashishia osang lemsateper. Nenok ajaki pei temang anepalutsü aser kanga kümdanga alitsüla. Iba virus ya atangji nunga shitak lir aser tetsübuttsüka. Tekolakpurtemi teyuba temzüing



ajak nung anidakang. Iba wara agi shiranga alir ajak yakta taneptsü angutsü asoshi parnok nem tashi agüjangma," ta Twitter ajanga Harmanpreet-i lemsatep.

Taoba ita India nung South Africa tetsür team den ODI series asayaba mapang, Harmanpreet yirurba liasü aser ibaji ajanga iba series temer sülen T20s asayamung nunga lai shilem magitet.

RIIN atema Joint Consultative...

(Tapak 1 nungi...)

JCC-i State level nung RIIN indang mapa inyaksü aser district level nung pei pei Deputy Commissioner-i anir ludentemi mapa inyaksü ta paisa ashi.

Tanü senden nung adenba kin hohotemi JCC pusema nungitogo aser tarutsü nung parnoki telemtetbatem agitsü. RIIN ya kanga dang onük tulu ka lir aser kümdanga inyatsüla, aji ta mesüra okadak sorkar anema ken o tem benoktsü akok, ta Kikon-isa metetdaksü.

"Onoki report reprangdangtsü aser onük talila benoktsü mesüra agientsü akok" ta Opposition Leader T R Zeliang-ia ashi.

"Taoba Chief Secretary Banuo Z Jamir-i aniba

Commission-i report agütsüba sülen pai Assembly nung benoktsü ta Chief Minister-i shiogo. Assembly nung report ji benoka olemteptsü ta paisa shiogo. Ajisüaka tang tashi report ji mebenok mesüra shingai mangu, anungji tangbo ni kecha meshitetsü" ta T R Zeliang-isa metetdaksü.

TR Zeliang-isa state sorkar dang Assembly nung yanglushiba ama ILP mapa akangakanga inyaksü metetdaksü.

Iba senden nung Chief Minister Neiphiu Rio, Deputy CM Yanthungo Patton, cabinet minister tem aser ruling o opposition MLA tem aden. Parnok den tongti

ketdangsurtem aser district ajak nungi Deputy Commissioner tem aden.

Senden nung kin balala nungi telok adenertem: Angami Public Organization, Ao Senden, Chakhesang Public Organization, Chang Khulei Setsang, Kachari Tribal Council Nagaland, Karbi (Mikir) Union, Nagaland, Konyak Union, Khiamniungan Tribal Council, Kuki Inpi (Nagaland); Lotha Hoho, Nagaland Garo Tribal Council, Phom Peoples' Council, Pochury Hoho, Rengma Hoho, Sumi Hoho, United Sangtam Likhum Pumji, Yimchunger Tribal Council, Zeliang People Organization, CNTC, ENPO aser TPO.



Dimapur, Rongchii/April 16, 2021: Fire Week 2021 shilem ama "Cycling for Fire Safety Awareness" omen kübok ayongba "Cyclothon" sentong nung shilem agirtem Hokolbar anogo Mokokchung lenmang ajangdang tangokba noksa ka yangi angur. Honibarnü (17.04.2021) iba sentong nung shilem agirtemi Changtongya aser Tuli tesem atongtsü sentong lir.

Tanü New Zealand tebur cricket team pur vaccine agitsü

Rongchii/April 16, 2021 (Agencies): Asaya ana series aser World Test Championship final atema England-i maodang, Honibarnü (17.04.2021) New Zealand-i parnok indang tebur cricket team aser support staff nem Covid-19 vaccine achaayanga agütsütsü sentong lir, ta Stuff sangdong ajanga metetdaksü.

Taoba ita Zealand Sorkari ashiba agi, linük tenüing nungi tongtibang asayamung nung shilem agitsü asoshi linük nung agitsü asoshi maangka agütsütsü.

June 18, 2021 nü Southampton nung India tebur cricket team den ICC World Test Championship final masayadang Test series asaya ana atem New Zealand cricket

team England-i aotsü. Iba Test series June 02, 2021 nü nungi tenzüka asayatsü.

Tokyo Olympics atema athlete tem Japan-i ayamesoa maodang Bodhbarnü, New Zealand-i linük tenüing nungi shilem agitsü alir athlete nem Covid-19 vaccine agütsü tenzüko. July 23, 2021 nungi August 08, 2021 tashi ayonga asayatsü aliba Games nung New Zealand nungi athlete 200 dak temai shilem agitsü imlar.

Nübur tsüingda Novel Coronavirus wara menatepba akok tashi azüoktsü asoshi junga achaayangtetba linük rongnung New Zealand ka asütsü aser taoba ita linük arrtsülen aliba tesemtem aser quarantine workers atema New Zealand-i COVID-19 Vaccination drive indang round tanabuba tenzüksüo.

BILEMDANGANG

"Pei wadang jibo peii dang inyaktet."